



ЎЗБЕКИСТОН ПРЕЗИДЕНТИ ВА ЭРОН ВИЦЕ-ПРЕЗИДЕНТИ ҚЎШМА ИННОВАЦИЯ ДАСТУРЛАРИНИ АМАЛГА ОШИРИШ ИСТИҚБОЛЛАРИНИ КЎРИБ ЧИҚДИЛАР

Ўзбекистон Республикаси Президенти Шавкат Мирзиёев 19 июль куни мамлакатимизда амалий ташриф билан бўлиб турган Эрон Ислом Республикаси вице-президенти Сорена Сатторийни қабул қилди.



Кўп қиррали Ўзбекистон — Эрон муносабатларини янада кенгайтириш масалалари кўриб чиқилди. Фан, инновация ва технологиялар соҳасида қўшма дастур ва лойиҳаларни илгари суришга алоҳида эътибор қаратилди. Учрашув аввалида Сорена Сатторий давлатимиз раҳбарига Эрон Президенти Иброҳим

Раисийнинг салом ва энг эзгу тилакларини етказди. Кейинги йилларда икки томонлама мулоқотлар ва ўзаро алмашинувларнинг фаоллашуви кузатилаётгани мамнуният билан қайд этилди. Савдо кўрсаткичлари ва кооперация лойиҳалари сони ҳам ортиб

бормоқда. Ўтган йили товар айирбошлаш 73 фоизга, жорий йил бошидан эса яна 22 фоизга ошди. Қўшма илмий-амалий тадқиқотлар ўтказиш борасидаги амалий ҳамкорликни кенгайтириш, изланиш ишлари ва венчур ташаббусларини молиялаштиришга хусусий секторни жалб

қилиш, олий таълим муассасалари ўртасидаги дастурларни қўллаб-қувватлаш, био- ва нано-технологиялар, IT соҳаларида, фармацевтика ва бошқа тармоқларда қўшма лойиҳаларни амалга ошириш учун мавжуд имкониятлар қайд этилди. Келажакда, шу жумладан, бўлажак

Ўзбекистон — Эрон инновация форуми ва ишбилармонлик тадбирлари доирасида қабул қилинадиган қўшма қарорлар ва имзоланадиган битимларни амалга ошириш бўйича "йўл харитаси"ни қабул қилиш юзасидан келишувга эришилди.

ЎЗА

ЎЗБЕКИСТОН ПРЕЗИДЕНТИ ГРУЗИЯ БОШ ВАЗИРИ БИЛАН АМАЛИЙ ҲАМКОРЛИКНИ КЕНГАЙТИРИШ ЙЎЛЛАРИНИ МУҲОКАМА ҚИЛДИ

Ўзбекистон Республикаси Президенти Шавкат Мирзиёев 19 июль куни расмий ташриф билан мамлакатимизда бўлиб турган Грузия Бош Вазири Ираклий Гарибашвилини қабул қилди.

Учрашувда икки мамлакат ўртасидаги амалий ҳамкорликка доир, энг аввало, транспорт ва логистика, савдо, sanoat кооперацияси соҳаларида қўшма лойиҳа ва дастурларни илгари суриш истиқболлари кўриб чиқилди. Транзит салоҳиятини, шу жумладан, мамлакатимиз юкларини ташишда Поти ва Батуми портлари инфратузилмасини самарали ишга солиш масала-

ларига алоҳида эътибор қаратилди. Ўзбекистон ва Грузия ҳудудидаги эркин sanoat зоналарида яратилган қўлай шароитларни ҳисобга олган ҳолда тўқимачилик, электротехника, озиқ-овқат, фармацевтика ва бошқа тармоқларда қўшма лойиҳаларни амалга ошириш учун имкониятлар мавжудлиги кўрсатиб ўтилди. Бундан ташқари, маданий-гуманитар алмашинувни фаоллаштириш ва

сайёҳлар оқимини оширишдан иккала томон ҳам манфаатдор экани қайд этилди. Икки томонлама Ҳукуматлараро комиссиянинг навбатдаги йиғилишини ўтказиш ҳамда ўзаро манфаатли ҳамкорликни янада кенгайтириш бўйича "йўл харитаси"ни қабул қилишга келишиб олинди.

ЎЗА

ЎЗБЕКИСТОН ПРЕЗИДЕНТИ МАРКАЗИЙ ОСИЁ ДАВЛАТЛАРИ РАҲБАРЛАРИНИНГ САММИТИДА ИШТИРОК ЭТАДИ

Ўзбекистон Республикаси Президенти Шавкат Мирзиёев Қирғиз Республикаси Президенти Садир Жапаровнинг таклифига биноан 21 июль куни Марказий Осиё давлатлари раҳбарларининг навбатдаги Маслаҳат учрашувида иштирок этиш учун Қирғизистоннинг Чўлпонота шаҳрига ташриф буюради.

Қирғизистон раислигида ўтадиган саммит ишида Қозғистон Республикаси, Тожикистон Республикаси ва Туркменистон Президентлари ҳам иштирок этиши кутилмоқда.

Минтақа мамлакатлари етакчиларининг учрашуви кун тартибидан турли йўналишларда, шу жумладан, савдо, транспорт ва логистика, sanoat кооперацияси, инновациялар, озиқ-овқат хавфсизлиги, туризм, маданий-гуманитар алмашинув соҳаларида амалий ҳамкорликни янада кенгайтириш масалалари ўрин олган.

Алоҳида эътибор Марказий Осиёнинг барқарорлиги ва изчил тарақиётига замонавий таҳдид ва хатарларга биргаликда қарши туриш борасидаги ҳамкорликни мустаҳкамлашга қаратилади.

Саммит якунида бир қатор муҳим кўп томонлама ҳужжатлар қабул қилиниши кўзда тутилган. Таъкидлаш лозимки, Марказий Осиё давлатлари раҳбарларининг Маслаҳат учрашувларини ўтказиш ташаббуси Ўзбекистон Республикаси Президенти Шавкат Мирзиёев томонидан 2017 йилда Бирлашган Миллатлар Ташкилоти Бош Ассамблеясининг 72-сессиясида илгари сурилган эди. Минтақа етакчиларининг биринчи саммити 2018 йил март ойда Нур-Султон шаҳрида, иккинчиси 2019 йил ноябрда Тошкент шаҳрида, учинчиси ўтган йилнинг август ойда Туркменистондаги "Аваза" миллий сайёҳлик зонасида бўлиб ўтган.

ЎЗА

ДОЛЗАРБ МАВЗУ

ТАКРОРИЙ ЭКИН:

200 МИНГ КИШИГА ҲАМ ИШ, ҲАМ ДАРОМАД



4-бетга қаранг.

ТАҲЛИЛ ВА ТАҚҚОС

Ғамлачилик:

ТАРИХИЙ ЎЗГАРИШЛАР ДАВРИ

Халқимизнинг яхши бир азалий анъанаси бор — кексаларимиз кўлини дуога очганда, албатта, "Деҳқончилигимиз баракасини берсин, уйимиз буғдойга, донга тўлсин", дея ният қилинади. Жорий йилда ғаллакорларимиз ана шундай қутлуғ ниятга муносиб меҳнат қилиб, гектар бошига ўртача 70 центнердан ҳосил етиштирди.

Давами 3-бетда



МАКТУБ

МЕҲР ЭШИКЛАРИ ОЧИЛГАН КУН

кўзларимизда қувонч ёшлари зоҳир бўлган эди

(Ўзбекистон Республикаси Президенти Шавкат МИРЗИЁЕВга)

Ҳурматли Шавкат Миромонович! Сизнинг донишманд сўзларингиз тўғрисида "Дўстлик" чегара пости очилган куни чорак аср давомида шу кунни интизорлик билан кутган икки қардош халқнинг қувончи ичига сиймай, кўзларидан секинча ёшлари оққан-

лигини оммавий ахборот воситалари орқали кўриб, ўқиб, бошимиз кўкка етган эди. Яратганга беадад шукрлар бўлсинки, вақт-соати келиб, адолат қарор топар экан.

Давами 6-бетда

